

適園叢書

張宗祥



通國書舍



張氏藏

補

史

十

五

秀

卯

代

二

夷

五代史記補考卷第一

五行考第四

水不潤下

梁開平四年青宋冀亳水詔令本州以省倉粟麥等振貸

五代

會要

後唐同光二年十二月中書門下奏今年秋天下州府例有水災百姓所納秋稅請特放加耗從之

同上

三年六月至九月大雨江河決壞民田七月洛水泛漲壞天津橋漂近河廬舍艤舟爲渡覆沒者日有之鄴都奏御河漲于石灰窑口開故河道以分水勢鞏縣河決沖注敖倉八月敕如聞天津橋未通往來百官以舟船濟渡因茲傾覆兼踣

泥塗自今文武百官可三日一趨朝宰臣卽每日中書視事
同上

長興三年七月諸州大水宋毫潁尤甚宰臣奏曰今秋萊州
管界水災最甚人戶流亡粟價暴貴臣等商量請于本州出
斛斗依時估出糶以救貧民兼大水之後頗無宿麥窮民不
辦種子亦望本州據人戶等第支借麥種自十石至三石候
來年收麥據原數卻令送納從之
同上

清泰元年九月連雨害稼詔曰久雨不止禮有所禳禱都城
門三日不止仍祈山川告宗廟社稷宜令太子賓客李延範
等祭之
同上

晉天福四年七月西京大水伊洛瀍澗皆溢壞天津橋八月

河決博平甘陵大水

同上

六年九月河決于滑邢一概東流居民登丘冢爲水所隔詔所在發舟船以救之襄州濮州界皆爲水所漂溺命鴻臚少卿魏玘將作少監霍廷讓右領衛將軍安璿右統衛將軍田駿于滑濮澶鄆四州檢河水所害稼并撫問遭水百姓襄州又奏河水東流闊七十里水勢南流入沓河及揚劉河至七年三月命宋州節度使安彥威率丁夫塞之河平建碑立廟于河決之所七年四月詔曰近年已來大河頻決漂蕩戶口妨廢農桑言念蒸民用茲凋敝凡居牧守皆委山河旣在封圻所宜專切今後宜令沿河廣晉府開封府尹逐處觀察防禦使刺史等並兼河隄使名額任使差選職員分擘句當有

隄堰怯薄水勢冲注處預先計整治不得臨時失于防護

同上

開運元年六月黃河洛河泛溢壞隄堰鄭州原武滎澤縣界

河決

同上

周廣順二年七月暴風雨京師水深二尺壞牆屋不可勝計

諸州皆奏大雨所在河渠泛害稼

同上

三年六月諸州大水襄州漢江泛溢壞羊馬城大城內水深

一丈五尺倉庫漂盡居人溺者甚眾

同上

後唐同光四年大水蘇州尤甚水中生米大如荳民取食之

吳越備史

天成四年秋七月台州大水

同上

晉天福五年姑蘇吳興嘉禾三郡大水

同上

周廣順三年六月丁酉蜀大水入成都漂沒千餘家溺死五十餘人壞太廟四室戊戌蜀大赦振水災之家

通鑑

火不炎上

後唐天成四年十一月汝州火燒羽林軍營五百餘間

先是司天

奏熒惑入羽林請會要京師爲火備至是應之

長興二年四月汴州封禪寺門下忽有火起沿燒近寺廬舍

相州黎陽縣亦火

三年十二月懷州軍營內三處火光自起人至卽滅不焚廬

舍

同上

晉天福三年十一月襄州奏火焚居民千餘家

同上

周顯德五年四月吳越王錢俶奏十日夜杭州火焚燒府署

殆盡上命中使齎詔恤問

同上

顯德五年夏四月辛酉城南火延於內城王出居都城驛詰旦煙燄未息將焚鎮國倉王命從官伐林木以絕其勢火遂

滅

吳越備史

梁乾化三年十一月己未夜蜀宮火庚申旦火猶未熄

通鑑

宣州節度田頔將作亂一日向暮有鳥五色如雉而大尾有火光如散星之狀自外飛入止戟門而不見翌日府中大火曹局皆盡惟甲兵存焉頔資以起事

稽神錄

廣政二十四年十月漢州什邡縣井中有火龍騰空而去

蜀檮

漢州什邡縣古井中夜有丈尺火龍騰躍而出浩浩升天而

去乃至鱗甲首足明耀赫變大風吼樹木皆拔餘燼墜地延

燒數百家

野人閒話

泉州文宣王廟庭宇嚴峻學校之盛甲于藩府庭中有阜莢樹每州人將登第卽生一莢以爲常梁貞明中忽生二莢有半莫諭其意乃其年州人陳逖進士及第黃仁隸學究及第仁隸恥之復應進士舉至同光中舊生半莢之後復生全莢其年仁隸及第後數年廟爲火災其年自稱尊號不復生莢遂至今矣

稽神錄

木不曲直

梁開平二年使其將李思安攻潞州營於壺口伐木爲柵破一大木木中隸書六字曰天十四載石進思安表上之其羣

臣皆賀以爲十四年必有遠夷入貢司天少監徐鴻獨謂其所親曰自古無一字爲年號者上天符命豈關數乎吾以爲丙申之年當有石氏王此地者移四字中兩豎書置天字左右卽丙字也移四之外圍以十字貫之卽申字也後至丙申歲晉高祖以石姓起并州如鴻之言

稽神錄

梁開平初潞州行營使李思安奏壺關縣穰鄉民伐樹樹仆自分爲二中有六字云天十四載石進梁帝藏於武庫時莫詳其義至帝卽位識者曰天字取四字兩畫加之于旁卽丙字也四字去中之兩畫加十卽申字也帝卽位之年乃丙申也進者晉也石者姓也

已上晉史舊云

臣謹按天祐二十年歲在癸

未其年莊宗建號改同光元年至清泰三年歲在丙申其年

晉祖卽位改元天福元年自未至申凡十四載矣故識書云
天十四載石進者自天祐滅後十四載石氏興於晉也豈不
明乎而拆字解識以就丙申非也

五代史闕文

僞蜀廣政末成都人唐季明父失其名因破一木中有紫紋
隸書太平兩字時欲進蜀主以爲嘉瑞一有識者解云不應
此時須至破了方見太平爾果自聖朝弔伐之後頻頒曠蕩
之恩寬其傷殘之俗仍改太平興國之號卽知識者之言諒
有證矣

茅亭客話

金不從革

劉龔初開國營構宮室得石識有古篆十六其文曰人人有
一山山值牛兔絲吞骨蓋海承劉解者云人人有一大人也

山山出也值牛者龔建漢國歲在丑也免絲者屍龔位歲在
卯也吞骨者滅諸弟也越人以天水爲趙爲蓋海指星朝國
姓也承劉者言受劉氏降也又乾和中童謠曰羊頭二四日
天雨至解者以羊是未之神是歲辛未二月四日國亡天雨
猶天水斥國姓又大寶末有稻田自海中浮來上魚藻門外
民聚觀之布衣林楚材見而歎曰水魚湫湫兮當時好事或
有記其語洎王師至潘美爲部署方悟爲潘字也

青箱雜記

後唐天成中僞漢欽州羅浮山民掘得古劍有篆文曰已與
水同宮王將耳口同尹來居口上山岫護重重以獻僞主劉
涉國人莫之辨及平廣南競傳其言知者云太宗以己亥年
降誕是己水同宮也於文口耳王爲聖尹口爲君重山爲出

蓋已亥年聖君出也

文獻通考

晉開運二年六月登州文登縣地內湧出金銅佛像四

同上

漢乾祐元年三月中書廚益鳴者七

是日宰相李壽罷免勒歸第

同上

南漢劉鋹時宮中井旁石自立行百餘步而仆

同上

晉開運元年七月一日夜大雷雨明德門內井亭有石槽槽

有龍首其夕漂行數步而龍首斷焉識者曰石國姓也而龍

首既斷大不吉之象晉祚果終於開運

同上

荆南高從誨鑿池於山亭下得石匣長尺餘扁鑄甚固從誨

神之屏左右焚香啟匣中有石文曰此去遇龍即歇及建隆

中其孫繼冲入朝改鎮徐州龍隆音相近

同上

唐末劉建峯定長沙遣馬殷領眾濬城壕得石碣有古篆十

八其文曰龍舉頭猴掉尾羊爲兄猴作弟羊歸穴猴離次解
者以殷乾寧三年丙辰歲代立乃龍舉頭也至乾祐辛亥國
亡乃猴掉尾也殷子希範以己未歲生又以開運丁未歲薨
乃羊歸穴也又子希崇壬申歲生後爲江南所俘乃猴離次
也

青箱雜記

馬希振亦殷之子清泰中卒葬長沙之陶浦掘得石碣其文
曰亂石之壤絕世之岡谷變庚戌馬氏無王蓋馬氏諸王雖
於周廣順辛亥歲遷于江南然其國之變實在庚戌歲故也
同上

周廣順初江南伏龜山圯得石函中有鐵銘云維天監十四
年秋八月葬寶公于是銘曰莫問江南事江南自有馮乘雞

登寶位跨犬出金陵子建司南位安仁秉夜鐙東鄰家道闕
隨虎遇明徵其字皆小篆體勢完具徐鉉徐鉉韓熙載皆不
能解及煜歸朝好事者云煜丁酉年襲位卽乘雞也開寶八
年甲戌江南國滅是跨犬也當王師圍其城而曹彬營其南
是子建司南位潘美營其北是安仁秉夜鐙也其後太平興
國三年淮海王錢俶舉國入覲卽東鄰也家道闕意無錢也
隨虎遇戊寅年也

江淮異人錄

江南自後漢以來民間有服玩侈靡者人詢之必對曰此物
屬趙寶子又煜之妓妾嘗染碧經夕未收會露下其色愈鮮
明煜愛之自是宮中競收露水染碧以衣之謂之天水碧及
江南滅方悟趙國姓也寶年號也天水趙之望也

宋史

保大中浚秦淮得石志按其刻有大宋乾德四年凡六字他皆磨滅不可識令諸儒參驗乃輔公祐反江東時年號後太祖受命國號宋改元乾德江左始衰弱

景定建康志

建在位有漢州人郭迴耕得古銅版以獻有王建王元膺已下六十餘字建乃改其長子名元膺以應其事識者曰膺者胸也胸者凶也皆非吉兆俄而元膺伏誅

五國故事

高氏專江陵自乾祐中於山庭後鑿一大池爲遊嬉之所掘地丈餘得一大石匣長丈餘闊數寸局鑄甚固主者不敢啟之以獻高氏大神之乃屏去左右惟與親寮屬三五人焚香而啟之匣中惟合篆銘一首云此去遇龍卽歇于是祕之至太祖龍飛改號建隆高氏亡國

宋汴采異錄